



02. marts 2010

UPA 2010/132

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqummiuppara:

Inuusuttunut inissianik Namminersorlutik Oqartussat aningaasaleeqataaffigisaannik sanaartornissaq pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Jane Petersen, Inuit Ataqatigiit)

Tungavilersuut:

Inuusuttorpasuaqarpoq inuttut pitsaasumik ineriartornissaminnik kissaateqartunik. Alloriarfiillu siulliit ilagisarpaat nammineerluni ineqalerneq. Ajoraluartumik Kalaallit nunatsinni inissaaleqineq patsisaalluni inuusuttorpasuit angajoqaaminniiginnartariaqarput, ilaasalu ukiorpaalunni namminerisamik inissaminnik neqeroorfigitinnissartik utaqqisariaqartarpaat.

Inuusuttorpasuaqarportaaq ilaqutariit iluanni ajornartorsiuteqartunik, taamaattorli allamik inissaqannginnamik ilaqtaminniillutillu qanigisaminniittariaqartunik. Isumaqarpunga inuusuttut taakku ilinniartuunnginnertik patsisigalugu immikkut ineqarsinnaannginnerat iliuseqarfigissallugu pisussaaffigipput.

Kalaallit Nunatsinni inuusuttorpasuaqarpoq qitornartaajaarsimasunik, ilarpassuisalu ilaqtattatik inissaqannginnertik patsigalugu najortariaqartarpaat, naak ilaatigut angajoqqaanngortut inissarsiorlutik allatsissimagaluarlutik. Inuusuttut qitornartaajaarsimasut inuttut pitsaasumik ineriartornissaannik periarfississinneqarnissaat pisussaaffigaarput. Angajoqqaanngortut inuiaqatigiinnik sullissinissaminnut nammineersinnaanerminnik timitaliinissaannut inuusuttut inissiaqalersinneratigut inuiaqatigiinnit tapersorsorneqarnermikkut aallarnisarneqarsinnaalluortoq isumaqarpunga.

Ullutsinni angajoqqaarpoq meeqqami inuusuttunngortup ineriartornissaanut tamakkiisumik tunniussinnaanngitsunik. Angajoqqaqaat ilaqarput ineqarfigisaminni ilaqtareeqqortussutsip annertunera imaluunniit ilaqutariit aningaasaqarniarnerat pissutigalugu inissamik angissutsikkut naleqquttumik inissaqartitsinngitsunik. Ilaqtariit taamatut nalaataqartut inuusuttaasa ajunnginnerusumik ineriartornissaminnut periarfissaqarsinnaaqqullugit inuusuttut inissiaannut qinnuteqarsinnaanerat periarfissaalissagaluarpoq.

Isumaqarpunga inuusuttoq kinaluunniit inuttut aammalu nammineernissaminik angusaqarusuttoq inuiaqatigiinnit tapersorneqarnissaa pissusissamisoortuusoq.

Piffinni ilinniartoqarfiusuni ilaqarpugut sumiiffimmi ilinniartoqarfiusumi ilinnialertumik. Ilinniartorlu taanna kollegiassaaleqineq pissutigalugu kollegiani ineqarsinnaanera tunullitinneqartarpoq ajornartinneqartarluniluunniit. Isumaqarpunga inuusuttut

inissiaqalernerisigut ilinniartoq ilinniartoqarfimmeereersoq allatulli nammineq inissaqarsinnaanera periarfissiuunneqartariaqartoq.

Taamatut siunnersuuteqarninni patsisaavoq ilisimagakku inuiaqatigiit pisussaaffigigipput nunatsinni inuusuttortatta ajunnginnerusumik atugaqarnissaat. Pingaruteqarporlu inuiaqatigiinni ineriartornitta ingerlaqqinnissaanut inuusuttut suli inuttut ineriartornissaminnut tapersersorneqarnermikkut inuiaqatigiinnut kiffartuussinissaminnut nunatta pisariaqartitaanut suleqataanissaminnut nammineersinnaassuseqarnissaat pinngitsoorneqarsinnaanngitsoq.

Inuusuttunut inissianik sanaartoorsinnaanissamut oqallilluarnissatsinnik kissaassillunga aammalu ukiamut 2011-mut Inatsisartut Aningaasanut Inatsisaata oqaluuserineqarnissaanut oqallinnerput taperseeqataasinnaajumaartoq neriutigaara.